

**ZAKON  
O STOMATOLOŠKOJ DJELATNOSTI**

# Z A K O N O STOMATOLOŠKOJ DJELATNOSTI

## I. OSNOVNE ODREDBE

### Član 1.

Ovim zakonom uređuju se: principi, mjere, način organiziranja i provođenja stomatološke djelatnosti, nosioci društvene brige za oralno zdravlje stanovništva, prava i obaveze osoba u pružanju i korištenju stomatološke zaštite, te sadržaj, način obavljanja i nadzor nad provođenjem stomatološke djelatnosti na teritoriji Federacije Bosne i Hercegovine (u daljnjem tekstu: Federacija).

### Član 2.

Stomatološka djelatnost, u smislu ovog zakona, jeste dio zdravstvene djelatnosti od posebnog interesa za Federaciju koja se obavlja na svim nivoima zdravstvene zaštite i podrazumijeva sistem društvenih, grupnih i individualnih mjera, usluga i aktivnosti za očuvanje i unapređenje oralnog zdravlja, sprečavanje oboljenja, rano otkrivanje oboljenja, liječenje, te zdravstvenu njegu i rehabilitaciju, kao i primjenu zdravstvenih tehnologija u oblasti stomatologije.

Stomatološka djelatnost iz stava 1. ovog člana obavlja se u sljedećim organizacionim oblicima i to:

- zdravstvenoj ustanovi,
- privatnoj praksi doktora stomatologije, odnosno privatnoj praksi doktora stomatologije - specijalista.

Stomatološku djelatnost iz stava 2. ovog člana pružaju stomatološki radnici i to: doktori stomatologije, doktori stomatologije - specijalisti, stomatološke sestre - tehničari i zubni tehničari primjenom savremenih postupaka i tehnologija u stomatologiji, te praćenjem dostignuća u razvoju stomatološke nauke.

### Član 3.

Svako lice ima pravo na stomatološku zaštitu i na mogućnost ostvarivanja najvišeg mogućeg nivoa oralnog zdravlja u skladu sa odredbama ovog zakona, propisa donesenih na osnovu ovog zakona, kao i Zakona o zdravstvenoj zaštiti ("Službene novine Federacije BiH", broj 46/10) i Zakona o zdravstvenom osiguranju ("Službene novine Federacije BiH", br. 30/97, 7/02, 70/08 i 48/11), te propisa donesenih na osnovu tih zakona.

Svako lice obavezno je brinuti se o svom oralnom zdravlju.

#### **Član 4.**

Zabranjuje se svaki vid diskriminacije na osnovu rase, boje kože, spola, jezika, religije ili vjerovanja, političkih i drugih uvjerenja, nacionalnog i socijalnog porijekla, prilikom obavljanja radnji na osnovu ovog zakona i propisa donesenih na osnovu ovog zakona.

Gramatička terminologija korištenja muškog ili ženskog roda podrazumijeva uključivanje oba roda u ovom zakonu i propisima donesenim na osnovu ovog zakona.

## **II. DRUŠTVENA BRIGA ZA ORALNO ZDRAVLJE STANOVNIŠTVA**

#### **Član 5.**

Društvena briga za oralno zdravlje stanovništva ostvaruje se na nivou Federacije, kantona, općine, odnosno poslodavca i pojedinca.

U okviru društvene brige za oralno zdravlje iz stava 1. ovog člana osigurava se stomatološka zaštita koja obuhvata:

- 1) očuvanje i unapređenje oralnog zdravlja, otkrivanje i suzbijanje faktora rizika za nastanak oboljenja zuba i usta;
- 2) promociju zdravih stilova života koji posebno doprinose očuvanju i zaštiti oralnog zdravlja sa naglaskom na značaj oralnog zdravlja u okviru cjelokupnog zdravstvenog stanja pojedinca;
- 3) provođenje preventivnih programa stomatološke zaštite djece, mladih i trudnica, uključujući i saniranje zuba predškolske djece;
- 4) sprečavanje, suzbijanje i rano otkrivanje oboljenja zuba i usta;
- 5) pravovremenu dijagnostiku, liječenje i rehabilitaciju oboljelih i povrijeđenih;
- 6) informacije koje su stanovništvu ili pojedincu potrebne za odgovorno postupanje i ostvarivanje prava na zdravlje, uključujući i oralno zdravlje.

Stomatološku zaštitu iz stava 2. ovog člana obavljaju zavodi za javno zdravstvo u Federaciji, zdravstvene ustanove, klinike stomatološkog fakulteta i privatne prakse doktora stomatologije, odnosno privatne prakse doktora stomatologije - specijalista.

Obavljanje stomatološke zaštite iz stava 2. tačka 3) ovog člana može biti preduvjet za upis djece u osnovnu školu, što se regulira posebnim propisima iz oblasti osnovnog obrazovanja.

### **Društvena briga za oralno zdravlje na nivou Federacije**

#### **Član 6.**

Društvenu brigu za oralno zdravlje na nivou Federacije čine mjere kojima se stvaraju uvjeti za provođenje stomatološke zaštite radi očuvanja i unapređenja oralnog zdravlja stanovništva, kao i mjere kojima se usklađuje djelovanje i razvoj sistema stomatološke zaštite Federacije.

## Član 7.

Društvena briga za oralno zdravlje na nivou Federacije u smislu člana 6. ovog zakona obuhvata:

- 1) uspostavljanje prioriteta, planiranje i donošenje posebnih programa za provođenje stomatološke zaštite;
- 2) donošenje zakona i podzakonskih akata iz nadležnosti Federacije;
- 3) uređenje i vođenje zdravstvene politike i provođenje reforme putem strateških planova razvoja;
- 4) vođenje zdravstvene politike koja podstiče i razvija zdrave životne navike stanovništva u vezi sa postizanjem optimalnog nivoa oralnog zdravlja;
- 5) osiguranje uvjeta za prosvjećivanje stanovništva o značaju oralnog zdravlja sa posebnim naglaskom na djecu, mlade, žene u toku trudnoće i materinstva;
- 6) osiguranje uvjeta za razvoj integriranog zdravstveno-informacionog sistema u oblasti stomatologije kao sastavnog dijela jedinstvenog zdravstveno-informacionog sistema u Federaciji;
- 7) osiguravanje uvjeta za stručno usavršavanje stomatoloških radnika;
- 8) razvoj naučno-istraživačke djelatnosti u oblasti stomatologije;
- 9) uspostavu sistema poboljšanja kvaliteta i sigurnosti stomatološke zaštite;
- 10) saradnju sa humanitarnim i stručnim organizacijama, stomatološkim komorama, savezima i udruženjima u oblasti razvoja stomatološke zaštite na teritoriji Federacije.

Federacija ostvaruje društvenu brigu za oralno zdravlje svojih stanovnika, posebno djece, mladih i trudnica provođenjem specifičnih preventivnih i kurativnih mjera.

Mjere iz stava 2. ovog člana donosi federalni ministar zdravstva (u daljnjem tekstu: federalni ministar) na prijedlog Zavoda za javno zdravstvo Federacije Bosne i Hercegovine.

Na prijedlog mjera iz stava 3. ovog člana Zavod za javno zdravstvo Federacije Bosne i Hercegovine dužan je pribaviti stručno mišljenje Federalne stomatološke komore.

## Član 8.

Federacija iz federalnog budžeta osigurava sredstva za:

- 1) provođenje društvene brige za oralno zdravlje na nivou Federacije iz člana 7. ovog zakona;
- 2) programiranje, usklađivanje, provođenje i praćenje izvršenja zdravstvenog prosvjećivanja i odgoja stanovništva u oblasti stomatologije;
- 3) programe preventivne stomatološke zaštite djece, mladih i žena tokom trudnoće i materinstva iz oblasti stomatologije, uključujući i saniranje zuba predškolske djece;
- 4) druge poslove i zadatke iz svoje nadležnosti određene ovim zakonom, propisima donesenim na osnovu ovog zakona, kao i Zakonom o zdravstvenoj zaštiti i Zakonom o zdravstvenom osiguranju.

Finansiranje djelatnosti iz stava 1. ovog člana zavisit će od mogućnosti prihodovne strane federalnog budžeta za fiskalnu godinu, kao i utvrđenih prioriternih politika Vlade Federacije Bosne i Hercegovine u fiskalnoj godini.

## **Društvena briga za oralno zdravlje na nivou kantona i općine**

### **Član 9.**

Društvena briga za oralno zdravlje na nivou kantona obuhvata mjere za osiguranje i provođenje stomatološke zaštite od interesa za građane na području kantona i to:

- 1) praćenje stanja oralnog zdravlja stanovništva i rada zdravstvenih ustanova u oblasti stomatologije na području kantona, kao i brigu o provođenju utvrđenih prioriternih programa u stomatološkoj zaštiti;
- 2) stvaranje uvjeta za pristupačnost i ujednačenost korištenja stomatološke zaštite na području kantona;
- 3) uspostavu sistema poboljšanja kvaliteta i sigurnosti stomatološke zaštite;
- 4) planiranje i ostvarivanje kantonalnih programa za unapređenje oralnog zdravlja, posebno djece, mladih, žena tokom trudnoće i materinstva;
- 5) provođenje epidemiološke, zdravstveno-statističke i socijalno-medicinske djelatnosti s ciljem unapređenja oralnog zdravlja i prevencije oboljenja na području kantona;
- 6) pregled umrlih osoba za potrebe dentalno-forenzičkih ispitivanja;
- 7) saradnju sa humanitarnim i stručnim organizacijama, stomatološkim komorama, savezima i udruženjima u oblasti razvoja stomatološke zaštite na području kantona.

Kanton može donijeti posebne programe stomatološke zaštite za pojedine kategorije stanovništva, odnosno vrste oboljenja specifične za kanton a za koje nije donesen poseban program zdravstvene zaštite na federalnom nivou u skladu sa svojim mogućnostima.

### **Član 10.**

Kantoni iz kantonalnih budžeta osiguravaju sredstva za:

- 1) provođenje društvene brige za oralno zdravlje na nivou kantona iz člana 9. ovog zakona;
- 2) hitnu stomatološku pomoć;
- 3) polivalentnu stomatološku zaštitu u zajednici u okviru obima i vrste prava iz obaveznog zdravstvenog osiguranja;
- 4) preventivnu stomatološku zaštitu djece, mladih i žena tokom trudnoće i materinstva;
- 5) specifičnu stomatološku zaštitu djece, mladih i žena tokom trudnoće i materinstva.

Finansiranje djelatnosti iz tač. 1) i 4) stav 1. ovog člana zavisit će od mogućnosti prihodovne strane kantonalnog budžeta za fiskalnu godinu i utvrđenih prioriternih politika vlade kantona u fiskalnoj godini.

Finansiranje djelatnosti navedenih u tač. 2), 3) i 5) stav 1. ovog člana obavlja se na teret sredstava obaveznog zdravstvenog osiguranja i iz drugih izvora na način i pod uvjetima predviđenim Zakonom o zdravstvenom osiguranju i propisima donesenim na osnovu tog zakona.

#### **Član 11.**

Društvena briga za oralno zdravlje na nivou općine obuhvata ocjenjivanje rada zdravstvenih ustanova i privatnih praksi koje obavljaju stomatološku djelatnost, kvalitet stomatoloških usluga, kao i osiguranje finansijskih sredstava za unapređenje njihovog rada i kvalitet stomatoloških usluga u skladu sa potrebama stanovništva i mogućnostima jedinice lokalne samouprave u skladu sa propisima o principima lokalne samouprave u Federaciji.

#### **Društvena briga za oralno zdravlje na nivou poslodavca, nivou pojedinca i briga za javno zdravlje**

#### **Član 12.**

Odredbe Zakona o zdravstvenoj zaštiti koje uređuju društvenu brigu za zdravlje na nivou poslodavca, na nivou pojedinca, kao i za javno zdravlje shodno se primjenjuju i u ovom zakonu.

### **III. LJUDSKA PRAVA I VRIJEDNOSTI U STOMATOLOŠKOJ ZAŠTITI I PRAVA, OBAVEZE I ODGOVORNOSTI PACIJENATA**

#### **Član 13.**

Odredbe Zakona o zdravstvenoj zaštiti koje uređuju ljudska prava i vrijednosti u zdravstvenoj zaštiti i prava pacijenata, kao i odredbe Zakona o pravima, obavezama i odgovornostima pacijenata ("Službene novine Federacije BiH", broj 40/10) shodno se primjenjuju i u ovom zakonu.

### **IV. PRINCIPI STOMATOLOŠKE ZDRAVSTVENE ZAŠTITE**

#### **Član 14.**

Odredbe Zakona o zdravstvenoj zaštiti koje uređuju principe zdravstvene zaštite i to: pristupačnost, pravičnost, solidarnost, sveobuhvatnost, kontinuiranost, specijalizirani pristup, stalno unapređenje kvaliteta i efikasnost, shodno se primjenjuju i u ovom zakonu.

## V. MJERE STOMATOLOŠKE ZAŠTITE

### Član 15.

Mjere stomatološke zaštite su:

- 1) provođenje zdravstvenog odgoja uz podizanje općeg nivoa znanja o oralnom zdravlju;
- 2) otkrivanje, otklanjanje uzroka, liječenje i rehabilitacija oralnih oboljenja, odnosno sprečavanje i suzbijanje zaraznih, hroničnih, masovnih nezaraznih (karijes) i malignih oboljenja;
- 3) prevencija karijesa kod predškolske i školske djece, omladine i trudnica, kao i druge anomalije zuba, oralnih tkiva i dentalnih kosti;
- 4) liječenje i oralno-dentalna rehabilitacija oboljelih, tjelesno i duševno hendikepiranih i povrijeđenih osoba;
- 5) osiguranje cjelovite (preventivna, kurativna, rehabilitacijska) stomatološke zaštite djece i omladine, te žena u toku trudnoće i materinstva;
- 6) snabdijevanje oralno-dentalnim lijekovima i drugim medicinskim sredstvima za obavljanje stomatološke djelatnosti u skladu sa Zakonom o lijekovima i medicinskim sredstvima („Službeni glasnik BiH“, broj 58/08), Zakonom o apotekarskoj djelatnosti („Službene novine Federacije BiH“, broj 40/10), kao i propisima donesenim na osnovu tih zakona;
- 7) pregled umrlih osoba za potrebe dentalno-forenzičkih ispitivanja.

Mjere stomatološke zaštite iz stava 1. ovog člana provode se na nivou kantona.

## VI. STOMATOLOŠKA DJELATNOST I NJENA ORGANIZACIJA

### Član 16.

Stomatološku djelatnost obavljaju doktori stomatologije, doktori stomatologije-specijalisti, stomatološke sestre - tehničari i zubni tehničari.

Stomatološka djelatnost iz stava 1. ovog člana obuhvata:

- 1) stomatološki zdravstveni odgoj i savjetovanje;
- 2) pregled kojim se utvrđuje postojanje ili nepostojanje oboljenja zuba i usne šupljine što uključuje planiranje i procjenu stanja pomoću stomatološko-medicinskih sredstava, stomatološki tretman kao preventivni, terapijski, restorativni, rehabilitacijski i estetski;
- 3) sprečavanje i suzbijanje oboljenja zuba i usne šupljine;
- 4) propisivanje lijekova, medicinskih sredstava u skladu sa Zakonom o apotekarskoj djelatnosti, kao i propisima donesenim na osnovu tog zakona;
- 5) izdavanje liječničkih uvjerenja u skladu sa Zakonom o zdravstvenoj zaštiti, kao i drugim posebnim zakonima iz ove oblasti;
- 6) kontinuiranu stručnu edukaciju u skladu sa Zakonom o zdravstvenoj zaštiti, kao i propisima federalne stomatološke komore;

- 7) obavljanje drugih poslova i zadataka u skladu sa ovim zakonom i zakonima iz oblasti zdravstva.

### **Član 17.**

Stomatološka djelatnost predstavlja organizirano pružanje stomatološke zaštite putem rada stomatoloških radnika u okviru zdravstvenih ustanova, odnosno privatne prakse, u skladu sa stručnom stomatološkom doktrinom i uz upotrebu zdravstvene tehnologije, a pod uvjetima i na način propisan ovim zakonom i propisima donesenim na osnovu ovog zakona, kao i Zakonom o zdravstvenoj zaštiti i propisima donesenim na osnovu tog zakona.

Stomatološka djelatnost se provodi kao primarna, specijalističko-konsultativna i bolnička djelatnost i djelatnost javnog zdravlja.

Sredstva potrebna za finansiranje stomatološke djelatnosti iz st. 1. i 2. ovog člana ostvaruju se iz prihoda prikupljenih na osnovu doprinosa za zdravstveno osiguranje, sredstava budžeta kantona u skladu sa mogućnostima kantonalnih budžeta u fiskalnoj godini, iz učešća korisnika zdravstvene zaštite u pokriću dijela ili ukupnih troškova stomatološke zdravstvene zaštite, kao i iz drugih izvora na način i pod uvjetima određenim Zakonom o zdravstvenom osiguranju i propisima donesenim na osnovu tog zakona.

### **Nivoi stomatološke djelatnosti**

#### **Član 18.**

Stomatološka djelatnost obavlja se na primarnom, sekundarnom i tercijarnom nivou zdravstvene zaštite, te na nivou federalnih i kantonalnih zavoda za javno zdravstvo.

#### **Član 19.**

Stomatološka zaštita na primarnom nivou zdravstvene zaštite obuhvata:

- polivalentnu stomatologiju (stomatologija u zajednici),
- dječiju i preventivnu stomatološku zaštitu,
- stomatološku dijagnostiku,
- praćenje stanja zuba i usta stanovnika i predlaganje mjera za zaštitu i unapređenje oralnog zdravlja stanovnika,
- prevenciju, liječenje i rehabilitaciju oboljenja i povreda zuba i usta,
- otkrivanje faktora rizika oboljenja zuba i usta i oboljenja uopće,
- specifičnu preventivnu stomatološku zaštitu djece, mladih i žena tokom trudnoće i materinstva,
- mjere za promociju prirodne ishrane dojenčeta - dojenje.

S ciljem osiguranja dostupnosti stomatološke zaštite na primarnom nivou zdravstvene zaštite ona mora biti organizirana tako da je korisnicima dostupna u općini njihovog prebivališta.

S ciljem osiguranja dostupnosti stomatološke zaštite specifičnih populacija na primarnom nivou zdravstvene zaštite razvija se i unapređuje prijateljski pristup mladima.

Na primarnom nivou zdravstvene zaštite može se organizirati i provoditi nastavna i naučno-istraživačka djelatnost u oblasti stomatologije u zdravstvenim ustanovama primarnog nivoa zdravstvene zaštite koje imaju status nastavne zdravstvene ustanove i odobrenje za obavljanje nastave, izdato na način i prema postupku utvrđenom Zakonom o zdravstvenoj zaštiti, kao i propisima donesenim na osnovu tog zakona.

Planovi i programi nastave iz stava 4. ovog člana podliježu saglasnosti federalnog ministra.

### **Član 20.**

Stomatološka djelatnost na primarnom nivou zdravstvene zaštite provodi se i organizira u timskom radu u kojem učestvuje najmanje doktor stomatologije i stomatološka sestra - tehničar.

Poslove u stomatološkoj djelatnosti na primarnom nivou zdravstvene zaštite obavljaju doktori stomatologije, stomatološka sestra - tehničar i zubni tehničar.

U stomatološkoj djelatnosti na primarnom nivou zdravstvene zaštite poslove stomatološke zaštite djece mogu obavljati i doktori stomatologije-specijalisti: polivalentne stomatologije, dječije i preventivne stomatologije, ortodoncije, kao i ostali specijalisti iz oblasti stomatologije u skladu sa potrebama stanovništva, te uz saglasnost kantonalnog ministra zdravstva.

Stomatološki timovi iz stava 1. ovog člana obavezni su sarađivati sa timovima porodične medicine, pedijatrima i ginekolozima, kao i ostalim specijalistima spram ukazane potrebe kod pojedinačnog pacijenta.

### **Član 21.**

Stomatološka djelatnost na sekundarnom nivou zdravstvene zaštite obuhvata specijalističko-konsultativnu i bolničku djelatnost iz oblasti stomatologije, a u skladu sa propisima o zdravstvenoj zaštiti i propisima o zdravstvenom osiguranju.

Na sekundarnom nivou zdravstvene zaštite može se organizirati i provoditi nastavna i naučno-istraživačka djelatnost u oblasti stomatologije.

Planovi i programi nastave iz stava 2. ovog člana podliježu saglasnosti federalnog ministra.

## **Član 22.**

Specijalističko-konsultativna stomatološka djelatnost na sekundarnom nivou zdravstvene zaštite predstavlja dio stomatološke djelatnosti koja pružanjem vanbolničkih usluga osigurava podršku stomatološke djelatnosti na primarnom nivou zdravstvene zaštite s ciljem povećanja stepena rješavanja stomatoloških problema kod pacijenata i racionalnijeg korištenja resursa u oblasti stomatologije.

## **Član 23.**

Stomatološka djelatnost na tercijarnom nivou zdravstvene zaštite obuhvata i pružanje najsloženijih oblika stomatološke zaštite iz specijalističko-konsultativnih i bolničkih stomatoloških djelatnosti, naučno-istraživački rad, te izvođenje nastave na osnovu ugovora za potrebe stomatološkog fakulteta.

Planovi i programi nastave iz stava 1. ovog člana podliježu saglasnosti federalnog ministra.

## **Član 24.**

Oblast maksilofacijalne hirurgije, kao specijalistička grana stomatološke i medicinske djelatnosti osigurava se u okviru bolničkih zdravstvenih ustanova.

Bolnička djelatnost maksilofacijalne hirurgije obuhvata dijagnosticiranje, liječenje i rehabilitaciju stomatoloških oboljenja, stanja i povreda, zdravstvenu njegu, boravak i prehranu pacijenata u bolnicama.

## **Član 25.**

Djelatnost javnog zdravstva u oblasti stomatologije se institucionalno obavlja putem zavoda za javno zdravstvo u Federaciji i odnosi se na statistička istraživanja iz oblasti stomatologije koja se provode radi ocjene stanja zdravlja zuba i usta stanovništva, te organizacije stomatološke zaštite.

Djelatnosti iz stava 1. ovog člana provode zavodi za javno zdravstvo u Federaciji, zdravstvene ustanove, privatne prakse, škole i fakulteti stomatološkog usmjerenja, strukovna stomatološka udruženja i stomatološke komore.

## **Član 26.**

Sa ciljem osiguranja principa kontinuiranosti stomatološke zdravstvene zaštite iz člana 14. ovog zakona, zdravstvene ustanove primarne, sekundarne i tercijarne zdravstvene zaštite koje obavljaju stomatološku djelatnost uspostavljaju jedinstven sistem upućivanja pacijenata sa jednog na drugi nivo zdravstvene zaštite primjenjujući odredbe člana 109. Zakona o zdravstvenoj zaštiti.

## **Organizacioni oblici u kojima se obavlja stomatološka djelatnost**

### **Član 27.**

Stomatološka djelatnost može se obavljati u:

- zdravstvenoj ustanovi,
- privatnoj praksi doktora stomatologije, odnosno privatnoj praksi doktora stomatologije-specijalista.

### **Član 28.**

Stomatološka zaštita može se obavljati u sljedećim zdravstvenim ustanovama:

- domovima zdravlja,
- ustanovi za hitnu medicinsku pomoć,
- stomatološkoj poliklinici koja se organizira kao samostalna zdravstvena ustanova ili kao dio bolničke zdravstvene ustanove,
- zavodu kao specijaliziranoj zdravstvenoj ustanovi,
- zdravstvenim ustanovama tercijarne zdravstvene zaštite.

Stomatološka zaštita obavlja se i u okviru klinika stomatološkog fakulteta u kojem se obavlja stomatološka zaštita za potrebe fakultetske nastave, kao i stomatološka zaštita koja se financira sredstvima obaveznog zdravstvenog osiguranja u skladu sa ugovorom zaključenim sa nadležnim zavodom zdravstvenog osiguranja, a na način i pod uvjetima utvrđenim Zakonom o zdravstvenoj zaštiti, Zakonom o zdravstvenom osiguranju i propisima donesenim na osnovu tih zakona.

### **Član 29.**

Privatnu praksu u stomatološkoj djelatnosti mogu obavljati doktori stomatologije, odnosno doktori stomatologije-specijalisti na način i pod uvjetima propisanim Zakonom o zdravstvenoj zaštiti i propisima donesenim na osnovu tog zakona.

Privatna praksa iz stava 1. ovog člana obavlja se u privatnim polivalentnim stomatološkim ordinacijama, odnosno privatnim specijalističkim stomatološkim ordinacijama sa ili bez zubotehničkog laboratorija.

Zubni tehničari mogu obavljati poslove privatne prakse u zubotehničkom laboratoriju prema uputama i stručnom nadzoru doktora stomatologije na način i pod uvjetima propisanim Zakonom o zdravstvenoj zaštiti i propisima donesenim na osnovu tog zakona.

### **Član 30.**

Doktor stomatologije može imati samo jednu stomatološku ordinaciju sa mogućnošću organiziranja najviše dvije funkcionalne stomatološke jedinice.

Ukoliko doktor stomatologije uz privatnu praksu osniva i zubotehnički laboratorij za potrebe svoje privatne prakse dužan je zaposliti na puno radno vrijeme zubnog tehničara sa položenim stručnim ispitom i licencom nadležne stomatološke komore.

U slučajevima iz stava 1. ovog člana doktor stomatologije u toku jednog radnog vremena može zaposliti još jednog doktora stomatologije za obavljanje poslova u drugoj funkcionalnoj stomatološkoj jedinici.

### **Član 31.**

Stomatološka ordinacija je osnovna organizaciono-radna jedinica koja ispunjava uvjete prostora, opreme i kadra određene Zakonom o zdravstvenoj zaštiti i propisima donesenim na osnovu tog zakona.

Doktor stomatologije je nosilac stručnih i organizacijskih poslova u stomatološkoj ordinaciji i dužan je poslove obavljati lično.

### **Član 32.**

Doktori stomatologije koji obavljaju privatnu praksu mogu se udruživati u grupnu privatnu praksu na način i pod uvjetima predviđenim Zakonom o zdravstvenoj zaštiti i propisima donesenim na osnovu tog zakona.

Doktor stomatologije iz stava 1. ovog člana zadržava svoju nezavisnost i vlastitu odgovornost prilikom obavljanja poslova i zadataka u grupnoj privatnoj praksi.

### **Član 33.**

Zdravstvene ustanove i privatne prakse koje obavljaju stomatološku djelatnost, kao i stomatološki radnici dužni su voditi i čuvati propisane stomatološke evidencije, što je sastavni dio stručnog rada u oblasti stomatološke djelatnosti u skladu sa propisima o evidencijama u oblasti zdravstva.

### **Član 34.**

Odredbe Zakona o zdravstvenoj zaštiti i propisa donesenih na osnovu tog zakona kojima se reguliraju prava i obaveze zdravstvenih radnika koji obavljaju privatnu praksu, grupna privatna praksa, odobravanje obavljanja privatne prakse, privremeno obustavljanje privatne prakse, prestanak obavljanja privatne prakse, ostvarivanje prihoda u privatnoj praksi, reklamiranje zdravstvenih usluga, dopunski rad zdravstvenih radnika - shodno se primjenjuju i u ovom zakonu.

## VII. STOMATOLOŠKI RADNICI

### Član 35.

Stomatološki radnici su osobe koje imaju obrazovanje stomatološkog usmjerenja i neposredno pružaju stomatološke usluge.

Stomatološki radnici u smislu ovog zakona su:

- doktor stomatologije,
- doktor stomatologije-specijalista,
- stomatološka sestra - tehničar,
- zubni tehničar.

### Član 36.

Doktor stomatologije je osoba koja ima završen stomatološki fakultet.

Doktor stomatologije-specijalista je osoba koja pored završenog stomatološkog fakulteta ima i položen specijalistički ispit iz odgovarajuće specijalističke discipline u oblasti stomatologije.

Stomatološka sestra - tehničar i zubni tehničar su osobe koje imaju završenu srednju školu stomatološkog usmjerenja.

### Član 37.

Opći uvjeti za obavljanje stomatološke djelatnosti za doktore stomatologije, stomatološke sestre - tehničare i zubne tehničare su:

- diploma stomatološkog fakulteta, odnosno diploma odgovarajuće srednje škole stomatološkog usmjerenja za zvanje stomatološka sestra – tehničar, odnosno zubni tehničar,
- položen stručni ispit u zvanju doktora stomatologije, stomatološke sestre-tehničara, odnosno zubnog tehničara,
- državljanstvo Bosne i Hercegovine,
- poslovna sposobnost,
- posjedovanje licence za rad koju izdaje nadležna stomatološka komora.

Izuzetno od stava 1. alineje 2. i 3. ovog člana, strani državljani mogu obavljati stomatološku djelatnost u Federaciji u skladu sa ovim zakonom, propisima o zdravstvenoj zaštiti, kao i drugim propisima koji reguliraju oblast zapošljavanja stranih državljana.

Poseban uvjet za obavljanje specijalističke djelatnosti u oblasti stomatologije je specijalizacija iz te oblasti.

### **Član 38.**

Djelatnost doktora stomatologije obuhvata samostalno obavljanje poslova prevencije, dijagnostike, liječenja i rehabilitacije stomatoloških oboljenja, povreda i stanja primjenom savremenih postupaka i tehnologija u stomatologiji, te praćenjem dostignuća u razvoju stomatološke nauke.

### **Član 39.**

Djelatnost zubnih tehničara koja se obavlja prema uputama i pod stručnim nadzorom doktora stomatologije obuhvata izradu zubnih, fiksnih i mobilnih protetskih nadomjestaka; izradu ortodontskih aparata, kao i izradu ostalih terapijskih zubno-protetskih pomagala.

### **Član 40.**

Djelatnost stomatoloških sestara - tehničara koja se obavlja prema uputama i pod stručnim nadzorom doktora stomatologije obuhvata asistenciju doktoru stomatologije pri pružanju stomatoloških usluga; održavanje higijene i čistoće opreme u stomatološkoj ordinaciji; vođenje propisane evidencije i stomatološke dokumentacije; obavljanje ostalih neophodnih pratećih radnji za funkcioniranje stomatološke ordinacije.

### **Član 41.**

U obavljanju poslova i zadataka stomatološke djelatnosti stomatološki radnici imaju sljedeća prava:

- na rad u skladu sa ovim zakonom i propisima iz oblasti zdravstva, a u skladu sa materijalnim mogućnostima zdravstvenog sistema Federacije,
- biti ravnopravni članovi stomatološkog tima u skladu sa ovim zakonom i Zakonom o zdravstvenoj zaštiti,
- odbiti učestvovanje u naučno-istraživačkim projektima ako nisu neophodni u stomatološkoj pomoći,
- odbiti da urade poslove i zadatke za koje nisu stručno osposobljeni,
- organiziranje, obavljanje i provođenje, te pravilno vrednovanje stomatološke djelatnosti u praksi,
- na stručno usavršavanje putem specijalizacije, odnosno kontinuirano usavršavanje koje organizira nadležna stomatološka komora, u skladu sa Zakonom o zdravstvenoj zaštiti i propisima donesenim na osnovu tog zakona,
- na sticanje počasnog naziva primarijus za doktora stomatologije u skladu sa Zakonom o zdravstvenoj zaštiti i propisima donesenim na osnovu tog zakona,
- druga prava koja proističu iz propisa iz oblasti zdravstva.

## Član 42.

U obavljanju poslova i zadataka stomatološke djelatnosti stomatološki radnici imaju sljedeće obaveze:

- obavljati poslove stomatološke djelatnosti stručno i etički besprijekorno u skladu sa pravilima struke, primjenom savremenih postupaka i tehnologija u stomatologiji, te praćenjem dostignuća u razvoju stomatološke nauke i uz poštivanje kodeksa stomatološke etike i deontologije,
- pružiti hitnu stomatološku pomoć bez odlaganja, a ostale pacijente primati prema stepenu prioriteta, odnosno prema listi čekanja,
- poštivati prava pacijenta utvrđena Zakonom o pravima, obavezama i odgovornostima pacijenata ("Službene novine Federacije BiH", broj 40/10),
- prijaviti zarazna oboljenja koja podliježu obaveznom prijavljivanju u skladu sa Zakonom o zaštiti stanovništva od zaraznih bolesti ("Službene novine Federacije BiH", broj 29/05) i propisima donesenim na osnovu tog zakona,
- prijaviti nadležnom organu ukoliko tokom obavljanja stomatološke djelatnosti posumnjaju da je smrt ili tjelesna povreda pacijenta nastala nasilnim putem u skladu sa propisima o krivičnom postupku,
- voditi i čuvati stomatološku dokumentaciju u skladu sa propisima o evidencijama u oblasti zdravstva, kao i propisima o čuvanju arhivske građe u Federaciji,
- obavezno se stručno usavršavati radi održavanja i unapređenja kvaliteta stomatološke djelatnosti u skladu sa ovim zakonom, kao i Zakonom o zdravstvenoj zaštiti,
- poštivati princip čuvanja profesionalne tajne,
- obavezno saradivati sa drugim članovima u stomatološkom timu, ostalim službama primarne zdravstvene zaštite posebno sa timovima porodične medicine, pedijatrima i ginekolozima, te ostalim specijalistima za koje se ukaže potreba, kao i višim nivoima stomatološke zaštite.

## Član 43.

Nije dozvoljeno na radna mjesta doktora stomatologije, stomatološke sestre - tehničara i zubnog tehničara zapošljavati osobe drugog zdravstvenog usmjerenja, kao i druge osobe bez stručnih kvalifikacija koje se traže u skladu sa ovim zakonom.

## Član 44.

Stomatološki radnici sve što saznaju o zdravstvenom stanju pacijenta moraju čuvati kao profesionalnu tajnu i ne smiju je odati.

Izuzetno, radi zdravstvene zaštite pacijenta ili njegove okoline doktor stomatologije može dati informacije o zdravstvenom stanju pacijenta uz odobrenje pacijenta, roditelja ili zakonskog zastupnika za maloljetnog pacijenta, odnosno staraoca za punoljetnog pacijenta lišenog poslovne sposobnosti.

Dužnost čuvanja profesionalne tajne stomatoloških radnika primjenjuje se i u slučajevima kada budu pozvani u svojstvu svjedoka u krivičnom i parničnom

postupku, na način i pod uvjetima predviđenim propisima o krivičnom postupku Federacije, kao i propisima o parničnom postupku.

Na obavezu čuvanja profesionalne tajne iz stava 1. ovog člana primjenjuju se i odredbe Zakona o pravima, obavezama i odgovornostima pacijenata kojim se uređuje pravo pacijenta na tajnost podataka, kao i propisi nadležne stomatološke komore.

## **Vrednovanje stomatološkog rada**

### **Član 45.**

Vrednovanje stomatološkog rada kao visoko specijalizirane djelatnosti od izuzetne vrijednosti za pojedinca i društvenu zajednicu, uređuje se Zakonom o radu („Službene novine Federacije BiH“, br. 43/99, 32/00 i 29/03) i kolektivnim ugovorom, uzimajući u obzir dugotrajnost dodiplomskog školovanja, specijalističkog i subspecijalističkog usavršavanja, radno iskustvo, trajne edukacije u svrhu obnavljanja licence, te izuzetne odgovornosti za zaštitu zdravlja pojedinaca i cjelokupnog stanovništva.

## **Humanitarni rad stomatoloških radnika**

### **Član 46.**

Stomatološki radnici mogu obavljati stomatološku djelatnost i bez naplate humanitarnim putem u saradnji sa vjerskim ili nevladinim udruženjima ili samostalno.

Obavljanje djelatnosti iz stava 1. ovoga člana stomatološki radnici moraju prijaviti nadležnoj stomatološkoj komori radi evidentiranja u registrima i evidencijama stomatološke komore.

## **VIII. KOMORA**

### **Član 47.**

Radi očuvanja i zaštite interesa svoje profesije, zadovoljavanja svojih stručnih i vlastitih potreba, osiguravanja uvjeta za organiziran nastup prema državnim organima, udruženjima, zdravstvenim ustanovama, proizvođačima i dobavljačima lijekova i medicinskih sredstava, kao i zaštiti zdravlja građana - doktori stomatologije, stomatološke sestre - tehničari i zubni tehničari obavezno se udružuju u stomatološke komore kao strukovna udruženja.

Stomatološku komoru iz stava 1. ovog člana čine i dva strukovna razreda i to:

- strukovni razred zubnih tehničara i
- strukovni razred stomatoloških sestara - tehničara.

Statutom nadležne stomatološke komore bliže se uređuju prava i obaveze članova ove komore, funkcioniranje strukovnih razreda iz stava 2. ovog člana, kao i njihov odnos i djelokrug rada, te zastupljenost u organima rukovođenja i organizaciji

rada stomatološke komore.

Nadležna ministarstva zdravstva prate rad stomatoloških komora sa stanovišta provođenja zakona i utvrđene politike iz oblasti zdravstva, te predlažu odgovarajuće mjere za unapređenje njihovog rada.

#### **Član 48.**

Na organizaciju i djelokrug rada komora iz člana 47. ovog zakona shodno se primjenjuje Zakon o zdravstvenoj zaštiti, ako ovim zakonom nije drugačije određeno, kao i Zakon o ravnopravnosti spolova ("Službeni glasnik BiH", broj 16/03).

#### **Član 49.**

Stomatološka komora može samostalno ili udruženo osnivati osiguravajuće fondove za doktore stomatologije, stomatološke sestre - tehničare, zubne tehničare, te druge oblike osobnog i materijalnog osiguranja u skladu sa Zakonom o društvima za osiguranje u privatnom osiguranju („Službene novine Federacije BiH“, broj 24/05).

#### **Član 50.**

U skladu sa odredbama Zakona o zdravstvenoj zaštiti, kao i propisima o udruženjima i fondacijama mogu se formirati udruženja stomatoloških radnika, odnosno udruženja kojima je cilj zadovoljenje najvišeg mogućeg nivoa oralnog zdravlja stanovništva i to na principima dobrovoljnosti.

Udruženja iz stava 1. ovog člana dobrovoljnim radom unapređuju oblasti za koju su osnovana, usaglašavaju i ujednačavaju stručne stavove u tim oblastima, te saraduju sa nadležnim ministarstvima zdravstva.

Udruženja mogu ostvarivati potporu iz budžeta kantona, odnosno Federacije u skladu sa mogućnostima ovih budžeta u kalendarskoj godini.

Nadležna ministarstva zdravstva vrše nadzor nad zakonitošću rada udruženja iz stava 1. ovog člana u skladu sa svojim nadležnostima.

### **IX. NADZOR**

#### **Član 51.**

Nadzor nad radom zdravstvenih ustanova, privatnih praksi i stomatoloških radnika obuhvata:

- unutrašnji nadzor,
- zdravstveno-inspekcijski nadzor,
- stručni nadzor od Federalne stomatološke komore.

Pored nadzora iz stava 1. ovog člana u zdravstvenim ustanovama i privatnim praksama može se provoditi provjera kvaliteta i sigurnosti stomatoloških usluga u postupku akreditacije od vanjskog tima ovlaštenih ocjenjivača kvaliteta u skladu sa propisima o sistemu poboljšanja kvaliteta, sigurnosti i o akreditaciji u zdravstvu.

## **Unutrašnji nadzor**

### **Član 52.**

Zdravstvena ustanova koja obavlja stomatološku djelatnost obavezno provodi unutrašnji nadzor nad radom svojih organizacionih jedinica i stomatoloških radnika.

Za stručni rad zdravstvene ustanove iz stava 1. ovog člana odgovoran je direktor.

Na unutrašnji nadzor iz stava 1. ovog člana shodno se primjenjuju odredbe Zakona o zdravstvenoj zaštiti i propisi doneseni na osnovu tog zakona.

## **Zdravstveno-inspekcijski nadzor**

### **Član 53.**

Zdravstveno-inspekcijski nadzor nad provođenjem ovog zakona i propisa donesenih na osnovu ovog zakona provodi kantonalna i federalna zdravstvena inspekcija.

Odredbe propisa o zdravstvenoj zaštiti, kao i propisa o inspekcijama u Federaciji, a koje se odnose na uvjete za osobe koje obavljaju poslove zdravstvenog inspektora, prava i obaveze zdravstvenih inspektora shodno se primjenjuju i u ovom zakonu.

## **Stručni nadzor Federalne stomatološke komore**

### **Član 54.**

Federalna stomatološka komora vrši stručni nadzor nad radom stomatoloških radnika: doktora stomatologije, stomatoloških sestara - tehničara i zubnih tehničara.

Stručni nadzor iz stava 1. ovog člana provodi se u skladu sa statutom i općim aktom kojim se bliže regulira provođenje stručnog nadzora.

Opći akt iz stava 2. ovog člana donosi se uz saglasnost federalnog ministra.

### **Član 55.**

Za vršenje stručnog nadzora pri Federalnoj stomatološkoj komori imenuje se Odbor za vršenje stručnog nadzora nad radom stomatoloških radnika.

Odbor iz stava 1. ovog člana obavlja sljedeće poslove:

- 1) organizira obuku stomatoloških radnika za vršenje stručnog nadzora;
- 2) donosi listu stomatoloških radnika koji vrše stručni nadzor;
- 3) donosi stručna mjerila za vršenje stručnog nadzora;
- 4) izrađuje prijedlog godišnjeg programa stručnog nadzora;
- 5) vodi evidenciju o izvršenom stručnom nadzoru i predloženim, odnosno poduzetim mjerama;
- 6) izrađuje godišnji izvještaj o izvršenom stručnom nadzoru;
- 7) koordinira provođenje stručnog nadzora sa nadležnom zdravstvenom inspekcijom;
- 8) obavlja i druge poslove u skladu sa statutom i općim aktima Federalne stomatološke komore.

### **Član 56.**

Za stručni nadzor nad radom doktora stomatologije u zdravstvenim ustanovama doktor stomatologije koji vrši stručni nadzor mora imati najmanje isti stepen zvanja kao i doktor stomatologije čiji se rad stručno nadzire i dugogodišnje radno iskustvo u struci.

Za stručni nadzor nad radom doktora stomatologije u privatnim polivalentnim stomatološkim ordinacijama doktor stomatologije koji vrši stručni nadzor je u zvanju općeg stomatologa sa dugogodišnjim radnim iskustvom u struci.

Za stručni nadzor nad radom doktora stomatologije u privatnim specijalističkim ordinacijama doktor stomatologije koji vrši stručni nadzor mora imati specijalizaciju iz djelatnosti privatne stomatološke ordinacije koju nadzire sa dugogodišnjim specijalističkim iskustvom u struci.

Stručni nadzor nad radom stomatološke sestre - tehničara i zubnog tehničara može vršiti doktor stomatologije, odnosno stomatološka sestra - tehničar i zubni tehničar.

Stomatološka sestra, odnosno zubni tehničar koji vrši stručni nadzor iz stava 4. ovog člana mora imati najmanje isti stepen zvanja kao i stomatološka sestra - tehničar i zubni tehničar čiji se rad stručno nadzire i dugogodišnje radno iskustvo u struci.

Ukoliko stručni nadzor iz stava 4. ovog člana vrši stomatološka sestra – tehničar, odnosno zubni tehničar on se provodi uz stručnu superviziju doktora stomatologije.

### **Član 57.**

Stručni nadzor može biti redovni i vanredni.

Redovni stručni nadzor provodi se u svim zdravstvenim ustanovama i privatnim praksama u skladu sa godišnjim programom stručnog nadzora.

Vanredni stručni nadzor vrši se u slučaju pisane i potpisane pritužbe na rad stomatološkog radnika, zahtjeva nadležnog ministarstva zdravstva, te drugih državnih tijela izvršne ili sudske vlasti.

Vanredni stručni nadzor može se provesti i na osnovu saznanja koja ukazuju na potrebu vanrednog stručnog nadzora.

### **Član 58.**

Stomatološki radnici u zdravstvenoj ustanovi i privatnoj praksi, kao i direktor zdravstvene ustanove, odnosno nosilac odobrenja za privatnu praksu obavezan je omogućiti vršenje stručnog nadzora i pružiti sve potrebne podatke i obavijesti.

### **Član 59.**

Stručni nadzor odnosi se isključivo na:

- 1) organizaciju rada i način poslovanja u zdravstvenoj ustanovi i privatnoj praksi;
- 2) stručne kvalifikacije stomatoloških radnika;
- 3) trajno usavršavanje stomatoloških radnika;
- 4) vođenje i čuvanje stomatološke dokumentacije u skladu sa propisima o evidencijama u oblasti zdravstva.

Provođenje stručnog nadzora iz stava 1. ovog člana ne podrazumijeva vršenje vanjske ocjene kontrole i sigurnosti koju provodi Agencija za kvalitet i akreditaciju u zdravstvu u Federaciji Bosne i Hercegovine, u skladu sa propisima o sistemu poboljšanja kvaliteta, sigurnosti i o akreditaciji u zdravstvu.

### **Član 60.**

O izvršenom stručnom nadzoru sačinjava se izvještaj kojim se utvrđuje činjenično stanje sa prijedlogom mjera.

Izvještaj iz stava 1. ovog člana dostavlja se nadležnom ministarstvu zdravstva, zdravstvenoj ustanovi i privatnoj praksi radi daljnjeg provođenja neophodnih mjera.

### **Član 61.**

Prilikom vršenja stručnog nadzora Federalna stomatološka komora saraduje sa zdravstvenim inspekcijama u Federaciji.

Ako pri vršenju nadzora Federalna stomatološka komora utvrdi povredu propisa i općih akata iz djelatnosti zdravstva, obavezna je o tome, bez odgađanja a

najkasnije u roku od 15 dana od dana saznanja, izvijestiti nadležnu zdravstvenu inspekciju.

## **X. KAZNENE ODREDBE**

### **Član 62.**

Novčanom kaznom u iznosu od 10.000,00 KM do 15.000,00 KM bit će kažnjeno za prekršaj pravno lice ako:

- 1) uskrati pružanje stomatološke zaštite (član 3.);
- 2) ne vodi i ne čuva propisanu stomatološku evidenciju (član 33.);
- 3) obavlja stomatološku djelatnost, a ne ispunjava uvjete propisane ovim zakonom i propisima o zdravstvenoj zaštiti (član 34.);
- 4) na radnom mjestu doktora stomatologije, stomatološke sestre - tehničara i zubnog tehničara upošljava osobu drugog zdravstvenog usmjerenja, odnosno drugu osobu koja nema potrebne stručne kvalifikacije u skladu sa Zakonom (član 43.).

Za prekršaj iz stava 1. ovog člana bit će kažnjeno novčanom kaznom u iznosu od 500,00 KM do 3.000,00 KM i odgovorno lice u pravnom licu.

Za prekršaj iz stava 1. ovog člana bit će kažnjeno novčanom kaznom u iznosu od 500,00 KM do 1.500,00 KM i doktor stomatologije koji obavlja privatnu praksu.

Pored novčane kazne počiniocu prekršaja iz stava 1. ovog člana može se izreći zabrana vršenja djelatnosti u periodu do šest mjeseci, a sa ciljem sprečavanja budućeg činjenja prekršaja.

### **Član 63.**

Novčanom kaznom u iznosu od 250,00 KM do 1.500,00 KM bit će kažnjen za prekršaj stomatološki radnik ako:

- 1) ne vodi i ne čuva propisanu stomatološku evidenciju (član 33.);
- 2) obavlja privatnu stomatološku djelatnost bez odobrenja nadležnog organa, odnosno izvan obima određenog odobrenjem nadležnog organa (član 34.);
- 3) obavlja stomatološku djelatnost bez položenog stručnog ispita i bez licence za rad koju izdaje nadležna stomatološka komora (član 37.);
- 4) ne poštuje obavezu čuvanja profesionalne tajne (član 44.).

Pored novčane kazne počiniocu prekršaja iz stava 1. ovog člana može se izreći zabrana vršenja djelatnosti u periodu do šest mjeseci sa ciljem sprečavanja budućeg činjenja prekršaja.

### **Član 64.**

Novčanom kaznom u iznosu od 500,00 KM do 1.500,00 KM bit će kažnjeno za prekršaj fizičko lice ako pruža stomatološku zaštitu, a ne ispunjava uvjete za obavljanje stomatološke djelatnosti, odnosno neovlašteno se bavi pružanjem stomatološke zaštite.

## **XI. PRIJELAZNE I ZAVRŠNE ODREDBE**

### **Član 65.**

Ovlašćuje se federalni ministar da propis iz člana 7. stav 3. ovog zakona donese u roku od šest mjeseci od dana stupanja na snagu ovog zakona.

Do donošenja provedbenog propisa iz stava 1. ovog člana primjenjivat će se odredbe propisa o zdravstvenoj zaštiti ukoliko nisu u suprotnosti sa odredbama ovog zakona.

### **Član 66.**

Na organiziranje i provođenje stomatološke djelatnosti regulirane ovim zakonom shodno se primjenjuje Zakon o zdravstvenoj zaštiti, Zakon o zdravstvenom osiguranju, Zakon o pravima, obavezama i odgovornostima pacijenata, Zakon o lijekovima i medicinskim sredstvima, Zakon o apotekarskoj djelatnosti, Zakon o zaštiti stanovništva od zaraznih bolesti, Zakon o krvi i krvnim sastojcima ("Službene novine Federacije BiH", broj 9/10), kao i propisi doneseni na osnovu ovih zakona, ako ovim zakonom nije drugačije određeno.

### **Član 67.**

Medicinske sestre – tehničari općeg smjera koje su na dan stupanja na snagu ovog zakona zatečene na radnim mjestima stomatološke sestre - tehničara smatraju se stomatološkim radnicima u smislu člana 35. ovog zakona pod uvjetom da one medicinske sestre – tehničari koje imaju pet i više godina medicinskog radnog staža u stomatološkoj djelatnosti stiču status stomatološke sestre, a medicinske sestre – tehničari kojima je medicinski radni staž manji od pet godina da se u roku pet godina dokvalifikuju u skladu sa Zakonom.

### **Član 68.**

Stomatološke komore na teritoriji Federacije formirane na osnovu propisa koji su bili u primjeni prije stupanja na snagu ovog zakona dužne su se uskladiti sa odredbama ovog zakona u roku od 12 mjeseci od dana stupanja na snagu ovog zakona.

### **Član 69.**

Ovaj zakon stupa na snagu osmog dana od dana objavljivanja u „Službenim novinama Federacije BiH“.

**PREDSJEDAVAJUĆA  
DOMA NARODA  
PARLAMENTA FEDERACIJE BIH**

Karolina Pavlović, prof.

**PREDSJEDAVAJUĆI  
PREDSTAVNIČKOG DOMA  
PARLAMENTA FEDERACIJE BIH**

Dr. Denis Zvizdić